

nai ministerin Anke Spoorendonk, wat tu began snååked.

- Iinje nowämber wus en delegatsjoon foon e Fryske Nasjonale Partij (FNP) aw besäk önjt gränslönj. Et schal ferseecht wårde, e friiske språke gemiinsoom as wråålskultuur-årwpårt önjtumalden.

- E 6. önj e jülmoune häi üusen ålereklub lååsid tu en fiirliken adwånts-eeftermadi önjt Galerie Café. Dåtkeer tooch ma Thora Kahl än schoulere foon Risem Schölj.

- Gary Funck heet di leeste saneene for jül ma en ra junge frasche wi en sünåmd jül-drååwen döörfjard.

- Üüs wunterfäst ma gräinküüljåasen as åltens e jarste fraidi önj e februar: jarling fiirden we wi ma ouer 100 moon tu en nai frasch teoterstuk foon Dolores: "Et koostet bloot en mamuut-tåis". Gina Ohlmeier unerhül ma schunge aw ainglich.

- Tut biikebrånen häin da frasche feriine Rökefloose, Frasche Feriin for e Ååstermååre än Friisk Foriining jarling wi eefter Risem önjt "Fraschlönj" lååsid. Dr. Alastair Walker hül e biikenreede. E Röke-floose häi deertu et teoterstuk "Da üülje, da goue" inöowed, schraawen foon Gary Funck.

- E 3. märts heet Dolores et stuk foon e mamuuttåis dan nuch en ouder tooch ap-fjard, dåt wus önjt Andersenhus.

Wat ouers sü låpt

- Üusen ålereklub drååwet ham widerhaane iinjtooch önj e moune önj Lunham önjt Galerie-Café tu en meekliken eeftermadi ma forleesen, koordespaalen än snååk.

- Üusen naie repräsentant önjt stjör foon e dånsche schöljferiin as Berit Nommensen. Jü heet di bantje foon Annegreth Brodersen ouernümen.

- Önj e septåmer häin üüs lasmoote gelåågenhåid, et årbe än e ütruchting foon e Foriining döör en interneet-fråågeboogen tu beurdiilen. Et riseltoot wårde we bait 90-iiri feriinsjubilåum präsentiiere låtje.

- Et stjör heet ham önjt fergången årbesiir seeks tooche tu meetinge drååwed, am da feriinsaktiwitåate tu ploonen.

- Uner e noome "Üusen åine wåi" häin we foon e Foriining tou tooche en hiilj sid aw frasch önj Flensburg Avis. Tubai da abonånte foue åål üüs lasmoote et blees amsunst ma e pust.

- Foon üüs lasmooteblees "Friisk Tising", wat üüs lasmoote ma e pust foue, san trii ütgoowe rütkiimen.

- Tu Berthold Bahnsens 100. iirdåi broochten da regjonaale bleese en artiikel ouer ham, wat Thomas Steensen schraawen häi. E Foriining ferseecht nü, giilj intuwiirwen for en gruter bökprojåkt ouer di frasche SSW-moon.

- Bai e Friisk Funk, Antenne Sylt än as uk önjt interneet uner friiskforiining.podspot.de koon följå åltens foon moundi bit fraidi tisinge aw frasch hiire, finantsiird foon e Foriining än språagen foon Gary Funck.

**Friiske tisinge arken dāi nai uner:
www.friiskforiining.podspot.de**

Wat kamt

- Interfriisk drååwen aw **Håililönj** (24. – 26. moi)

- Üüs **90-iiri feriinsjubilåum** aw „Fraschlönj“ (2. juuni)

- 3. **Friesisch-Historisches Treyben** önj Naibel (5. – 7. juuli)

- **Jöögedspråkeråis tu e Fåröer** (24. juuli – 1. august).

- **Samerütfluch** eefter Alsen/Sønderborg (31. august)

- 26. **harfsthuchschölj** önj Jarplund (2. – 6. oktober)

- Friisk **teoterseminaar** önj Jarplund (22. – 24. nowämber)

- Friisk **musical** prämjåare önj Naibel (15. detsåmber)

Jörgen Jensen Hahn, 1. formoon

Ouer 60 biike önj Fraschlönj

Bråist. Jarling san süwat 60 biike önj Nord-fraschlönj tånd wörden. Teeld wörden san's foont Nordfriisk Instituut önj Bråist. Di üülje frasche iilj-schake gungt aw en fakeldoos tubååg, wat tu faseloomt doonsed wörd. Jü modårn form foont biikebrånen ma e fååste termiin di 21. februar as sunt et 19. iir-hunert foon Sal ouer e ailönje än hålie språåt wörden än heet önj e leeste iirtiinde långs e küst foon Nordfraschlönj foole önj-



klång fü-nen. In-twasche as et fäst maning ståagne tu en fååsten termiin uk

önj e politiische kalåner wörden. Repräsentante foon e komuune naame oofting e gelåågenhåid wåar än grip önj e biikereede regjonaale teeme ap. Sü köö huum t.b. loonrådj Dieter Harrsen jarling aw Feer snååken hiire, än bai e biikeemfång foon e Frasche Rådj di 23. februar önjt Hüsemer Slot wus Torsten Albig di hoodreedner.

Impräsum: Friisk Foriining, Friisk Hüs,
Süderstr. 6,
25821 Bredstedt/Bråist
ViSdP: Manfred C. Nissen